

Magaly Brito ta splica:

Formador a comparti cu SEPPA e deseonan di Gobernador pa e siguiente gobernacion

ORANJESTAD (AAN) – Den entrevista cu Matutino DIARIO, señora Magaly Brito, Secretario General di SEPPA, a duna di conoce cu diahuebs mainta Formador mr. Mike Eman a comparti cu e sindicato, kico ta e deseonan di Gobernador pa loke ta regarda e siguiente periodo di gobernacion 2014-2017.

SEPPA di su banda a haya oportunidad di trece nan puntonan dilanti, riba con nan ta mira e situacion actual na Aruba, e retonan cu tin nos dilanti y e accionnan cu nan ta kere cu gobierno lo mester tuma den e proximo gobernacion.

E dama sindicalista a subraya cu importante den henter e

discusionnan aki ta cu como sindicato di sector publico, nan a haya oportunidad di mustra riba e situacion di empleadonan publico, y den un situacion financiero unda tur hende por a tuma nota di e contenido di e rapport di IMF, entre otronan, cu cualkier deficit den e caha di pueblo y den e presupuesto nacional por afecta e empleadonan publico riba hopi nivel y cu tur su consecuencianan.

El a comenta cu hopi empleado publico ta bay traha demotiva pasobra e prome post unda cu gobierno ta corta ta e presupuesto pa su trahadornan, y nan no ta bay tin material pa traha, sin kita afo cu poco, poco nan ta

debilita nan posicion pa un negociacion na mesa.

E dama a indica cu manera ta conoci empleadonan publico tin algun asunto pendiente, y SEPPA ta kere cu e temanan aki mester continua, manera revision di salario despues di tanto aña cu esaki ta stanca; tin e tema di indexing y un inhaalmanoeuvre pendiente, y cu ta danki na e lucha cu e sindicato a hiba na aña 2008 awendia nan por reclama esaki tambe.

Sra. Brito a agrega cu tin algun toelage cu no a cambia for di aña 1977 y ta sumanan asina anticua cu no ta cuadra mes cu e realidad di awendia y ta haci e empleadonan demotiva.